



Eich cyf/Your ref P-06-1173
Ein cyf/Our ref JJ/10901/21

Jack Sargeant AS
Cadeirydd – Y Pwyllgor Deisebau

deisebau@senedd.cymru

16 Medi 2021

Annwyl Jack,

Diolch am eich llythyr dyddiedig 22 Gorffennaf ynghylch Deiseb P-06-1173 'Rhowch warchodaeth gyfreithiol i Ardaloedd Tirwedd Arbennig dynodedig yng Nghymru' a chynnig cyfle i gyflwyno rhai safbwyntiau i'r Pwyllgor ar y materion a godir yn y ddeiseb.

Mae Ardaloedd Tirwedd Arbennig (ATA) yn fecanwaith polisi cynllunio hirsefydlog, a ddefnyddir yn eang gan awdurdodau cynllunio lleol i ddarparu ar gyfer gwarchod a gwella tirweddau lleol. Er eu bod yn ddynodiad tirwedd anstatudol (o'i gymharu â Pharc Cenedlaethol neu Ardal o Harddwch Naturiol Eithriadol) maent yn fecanwaith polisi sydd ar gael i awdurdodau cynllunio lleol i gydnabod nodweddion, priodoleddau a rhinweddau tirwedd o arwyddocâd lleol. Mae awdurdodau cynllunio lleol wedi ystyried, ac yn parhau i ystyried, ATA fel ffordd o ddiogelu tirweddau sensitif mewn Cynlluniau Datblygu Lleol ac wrth ddatblygu dealltwriaeth ac ymwybyddiaeth o'r nodweddion hynny sy'n rhoi ymdeimlad o le i ardal.

Mae'r broses o ddynodi ATA a ddilynir gan awdurdodau cynllunio lleol yn gadarn ac yn seiliedig ar dystiolaeth (Polisi Cynllunio Cymru 11, para 6.3.12/13); dylai awdurdodau cynllunio ddatgan pa nodweddion, priodoleddau neu rinweddau tirwedd sydd angen eu diogelu'n ychwanegol ac egluro sut y bydd y polisi neu'r dynodiad yn cyflawni'r amddiffyniad hwn. Dylid defnyddio [LANDMAP](#) (polisi tirwedd cenedlaethol ac offeryn gwneud penderfyniadau a gynhelir ac a reolir gan Cyfoeth Naturiol Cymru) ac unrhyw asesiadau cymeriad tirwedd cysylltiedig i lywio polisïau tirwedd lleol ac i helpu i nodi neu ddiwygio ATA.

Mae Polisi Cynllunio Cymru 11 yn ddiamwys yn datgan mai “dynodiadau anstatudol yw ATA sy'n diffinio ardaloedd lleol o bwysigrwydd tirwedd mawr, a allai fod yn unigryw, yn eithriadol neu'n benodol i'r ardal. Dylai awdurdodau cynllunio roi'r dynodiadau hyn ar waith lle mae rheswm da dros gredu na all polisïau cynllunio arferol eu gwarchod yn ddigonol”.

Ochr yn ochr â'r fframwaith polisi ar gyfer ATA fel y'u pennir ym Mholisi Cynllunio Cymru, mae gennym hefyd fframwaith polisi ehangach, cyd-destunol yng Nghymru'r Dyfodol.

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Gohebiaeth.Julie.James@llyw.cymru
Correspondence.Julie.James@gov.Wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Mae Cymru'r Dyfodol – y Cynllun Cenedlaethol 2040 yn cyflwyno dull diogelu ym Mholisi 9 ar gyfer gwarchod cynefinoedd (ymhlith amcanion eraill) i sicrhau nad ydynt yn cael eu peryglu'n ormodol gan ddatblygiadau. Mae'r polisi cynllun datblygu haen uchaf hwn yn gosod canllaw polisi cryf i helpu i sicrhau nad yw ardaloedd o dir a allai fod yn bwysig ar gyfer ehangu neu gysylltu rhwydweithiau ecolegol, addasu i newid yn yr hinsawdd neu bwysau eraill, neu sy'n darparu gwasanaethau ecolegol allweddol yn cael eu peryglu gan ddatblygiad. Mae'r polisi diogelu yn gweithredu ar raddfa tirwedd a gellir diogelu ardaloedd am amrywiaeth eang o resymau. Gall y rhain gynnwys cynyddu gwytnwch neu gysylltedd rhai mathau o gynefinoedd, creu cynefin, neu ar gyfer darparu seilwaith gwyrdd.

Gall y dull polisi diogelu fel y'i nodir yng Nghymru'r Dyfodol helpu i ddiogelu ac adfer nodweddion tirwedd a gall alluogi'r system gynllunio i weithredu a all ategu dulliau ehangach o reoli adnoddau naturiol yn gynaliadwy.

Er ei bod yn 'ddyddiau cynnar' i bolisïau Cymru'r Dyfodol hidlo drwy'r system gynllunio, mae dyheadau polisi Llywodraeth Cymru yn uchel ac yn uchelgeisiol; mae statws cyfreithiol Cymru'r Dyfodol yn golygu bod yn rhaid i bolisïau a phenderfyniadau lleol gydymffurfio â Chymru'r Dyfodol.

Hyderaf y bydd y wybodaeth uchod yn helpu'r Pwyllgor wrth i chi baratoi ar gyfer ystyried y ddeiseb.

Yn gywir,



Julie James AS/MS

Y Gweinidog Newid Hinsawdd
Minister for Climate Change